

ՂԵՎՈՆԴ ԱԼԻՇԱՆԻ ԿԵՆՍԱՓԻԼԻՍՈՓԱՅՈՒԹՅՈՒՆԸ
(Մահվան 100-ամյակի առթիվ)

ՅՈՒՐԻ ՀՈՎԱԿԱՆՅԱՆ

Այս տարի լրացավ XIX դ. Հայ մշակույթի ամենանշանավոր ներկայացուցիչներից մեկի՝ Ղևոնդ Ալիշանի մահվան Հարյուր տարին: Ալիշանը ծնվել է 1820 թ. Հուլիսի 18-ին Կ. Պոլսում՝ Պետրոս-Մարգար և Թագուհի Ալիշանյանների ընտանիքում: Գրոց անունը Քերովբե է: 1832 թ. մայիսի 9-ին իր կրտսեր եղբոր՝ Սերովբեի (նշանավոր հնագետ) և մի քանի ուրիշ Հայ պատանիների հետ, Մխիթարյան միաբանության նշանավոր գիտնական Հայրերից մեկի՝ Մկրտիչ Ավագբեյյանի առաջնորդությամբ Կ. Պոլսից ուղևորվում է դեպի Ս. Ղազար՝ Հայ մշակույթի նշանավոր կենտրոններից մեկը: Նորընծայարանում չորս տարի սովորելուց հետո, 1836 թ. կասարվում է Ալիշանի փիլոսոփայությանը և այդ կապակցությամբ ստանում է Հայ եկեղեցու սրբերից՝ Ղևոնդ Երեցի անունը:

Ալիշանը ապրեց 82 տարի: «Սիմէոն ծերունիին պես պիտի ապրիմ ու պիտի սպասեմ...», – ասել է Հ. Ալիշանը միաբանության անդամներից մեկին: Եվ սպասեց նա, սպասեց երկար, բայց Հայ Մեսիան չեկավ: «Երգեց, աշխատեցավ եւ այն մեսիաին տենչով հալեցաւ, մաշեցաւ, սպասեց եւ ծերացաւ, ոգեաւ ոգին ալ սպասեց, բայց չխաբվեցաւ...»¹, – գրում է Ալիշանի կենսագիր Ա. Երեմյանը:

Ալիշանը մահացավ 1901 թ. նոյեմբերի 22-ին: Նրա մահը վերածվեց Համազգային սգի: Մի սլազ մոռացվեց նրա եկեղեցական պատկանելությունը: Մահախոսական հոգվածներ հրապարակեցին Հայկական բոլոր լրագրերն ու ամսագրերը: 1901 թ. իր Համարներից մեկում «Մշակը» գրում է. «...Հ. Ալիշանը ամբողջ աղգին է պատկանում, որովհետև նրան սիրելու համար չը պետք է լինել լուսավորչական, կաթոլիկ կամ բողոքական, այլ միայն Հայ»², միաժամանակ պահանջում է, որ նրա մահվան կապակցությամբ հոգեհանգիստ արվի Հայկական բոլոր եկեղեցիներում: Իհարկե, Հայկական բոլոր եկեղեցիներում հոգեհանգիստ չտրվեց: Նույնիսկ Հովհաննես Թումանյանի և առաջադեմ մյուս մտավորականների միջամտությունից հետո հոգեհանգիստ կատարվեց միայն Թիֆլիսի Հայ կաթոլիկ եկեղեցում. հոգեհանգստին ներկա էին ազգային բոլոր երևելիները, նրանց թվում էր նաև վիրահայոց թեմի առաջնորդը:

Հայ հասարակությանը Ղ. Ալիշանը ծանոթ է որպես բանաստեղծ, ում ժողովուրդը «Ավարայրի բլբուլ» և «Քաղցրանվագ Նահապետ» կոչումն է տվել և ում բանաստեղծական արվեստի մասին դեռևս 1864 թ. Մ. Նալբանդյանը գրում էր, որ «չափաբերական քերթվածոց մեջ արժանավոր

1 Ս. Երեմյան. Կենսագրություն Հ. Ալիշանի. Վենետիկ, 1902, էջ 208:

2 «Մշակ», 1901, № 252:

վարդապետը ախոյան չունի»³, իսկ Ա. Չոպանյանը գրում էր, որ «Ալիշանի բանաստեղծութեանց մեջ կան էջեր որ, մտածումին խորութեամբն ու ձև-ւին բարդ ու նուրբ գեղեցկութեամբը, Հիւկոյի կամ Պայրընի հավաքածոյի մը մեջ պիտի կրնային տեղ ունենալ»⁴: Որպես բանաստեղծ Ալիշանը հայտնի էր իր «Նուագներ»-ով, հատկապես «Հայրունի» հատորյակով, որը Ս. Երեմյանի բնութագրմամբ «մեր ազգային խմբերգին երգարանն է...»: Ալիշանը հայտնի է նաև որպես բազմագիտակ պատմագիր և աշխարհագիր, հատկապես իր «Շիրակ. տեղագրութիւն պատկերացոյց» (1881 թ.), «Սիսուան, համագրութիւն հայկական Կիւիկիոյ և Լեւոն Մեծագործ» (1885 թ.), «Այրարատ» (1890 թ.), «Սիսական. տեղագրութիւն Սիւնաց աշխարհի» (1893 թ.) և արժեքավոր այլ հետազոտութիւններով, որոնց մասին Ալ. Երիցյանը գրում է. «Հ. Ալիշանի քնարերգական նուագները չեն միայն, որ լուսոյ ճառագայթների նման թափանցում են մեր հոգևոյն մեջ, այլ եւ նորա պատմական-հետազոտական աշխատութիւնները, երբեմն 'ի վնաս նոյն իսկ առարկայի գիտական ոճին, շնչում են անպաճոյճ, բայց պարզ, եռող, մաքուր բոցով եւ ջերմացնում են սառած սրտերը»: Շարունակելով իր միտքը Երիցյանը գրում է, որ եթե անգամ Ալիշանը «ընդհանուր մարդկութեան համար համահաւասար ընդունուած մի գերբնական շնորհք չունի իր մեջ», ապա «հայկական մտաւոր կեանքի համեստ ասպարեզում նա մի բարոյական ուժ է»⁵:

XIX դ. երկրորդ կեսին ինչպես «տաճկահայ», այնպես էլ «ռուսահայ» հասարակութեան մեջ հայ մտավորականութիւնը «իրեն նպատակ ունեն բուժել հայ ցեղը ահաւոր հիվանդութենէ մը, որ անոր ուղեւծուածին մեջ մտած էր»: Այդ «ահաւոր հիվանդութիւնը», որ Ա. Չոպանյանը «ըստրկախտ»⁶ է անվանում, բուժելու առավել արդյունավետ միջոցներից մեկը համարվում էր ժողովրդին իր հերոսական անցյալի և իր քաջակորով նախնիների, ինչպես նաև եկեղեցու նահատակների գործունեութեան հետ ծանոթացնելը: Դա լավ էին գիտակցում նաև Մխիթարյան միաբանութեան անդամները, որոնք հետևում էին իրենց հանճարեղ առաջնորդի սկզբունքին. «Պատմութիւն ի հայս՝ օգնեսցես զմեզ»⁷:

Յուրաքանչյուր ժողովուրդ իր ներկան, առավել ևս իր ապագան, կառուցում է անցյալի հիմքի վրա: «Պատմութիւնը մարդկային գործերի մեջ իմաստութեան գլխավոր ուղին է», – ասում է XX դ. խոշոր պատմաբաններից մեկը՝ և նա իրավացի է, որովհետև ո՛չ ներկան կարող է պտուղ տալ և ո՛չ էլ ապագան կարող է պտուղ խոստանալ, եթե դրանց արմատները չեն սնվում պատմութեան ակունքներից:

3 Մ. Ն ա լ բ ա ն դ յ ա ն. Երկեր. Երևան, 1979, էջ 486:

4 Ա. Չ ո պ ա ն յ ա ն. Դեմքեր. Փարիզ, 1924, էջ 51:

5 Ա լ. Ե Ր Ի Կ Ե Ա Ն. Վեներեկի Մխիթարեանք. Թիֆլիս, 1883, էջ 131:

6 Ա. Չ ո պ ա ն յ ա ն. Մկրտիչ Պեշեկթաշլյանի կեանքն ու գործը. Փարիզ, 1907, էջ 9:

7 Հ. Վ. Թ ո Ր Ո Ս Ե Ա Ն. Վարք Մխիթարայ Աբբայի Սեբաստաօմոյ. Վեներեկ, 1932, էջ 252:

8 Տե՛ս Ի. Ս. Կ ո Ն. Философский идеализм и кризис буржуазной исторической мысли. М., 1957, с. 403.

Ալիշանը նույնպես զիմում է պատմությանը, երգում է հայ ժողովրդի հերոսական անցյալը, համոզված, որ յուրաքանչյուր ժողովրդի համար նրա պատմությունը ոչ միայն իրագործությունների պարզ արձանագրություն է, այլև՝ կենսագրություն, որն օրինակների միջոցով կրթում և դաստիարակում է ժողովրդին:

Պատմության թատերարեսմ իջած երիտասարդ սերունդը կարիք ուներ բարձր գաղափարների ու վեհ իդեալների՝ Հայրենիքի, Ազատության, Անկախության: Նա որոնում էր հերոսացման ճանապարհը... Անհրաժեշտ էր ցույց տալ այդ ճանապարհը, և դա կարող էր անել միայն պատմությունը: Եվ Ալիշանը զիմում է պատմությանը: Նրա նպատակը ոչ թե սրբացումն է այն ամենի, ինչը որ հայկական է, ունի հայկական ծագում և դալիս է հնից, ինչպես ենթադրում է Ն. Գաբրիելյանը⁹, այլ՝ «սթափեցնել, արթնցրել հայը իր դարաւոր մահաթմբի խոր քունեն, ցուցնել անոր թէ նա երբեմն մեծ եղած է, հավասար ուրիշ մեծ ազգաց, որպեսզի գիտակցութիւնն ունենալով իր երբեմնի վիճակին, ցնցուի, թռիչներ առնու իր այն ստոր վիճակեն դեպ ի կանգնում, դեպ ի զարգացում յառաջագիմելու»¹⁰:

Ալիշանը հայտնի է նաև որպես հմուտ մանկավարժ¹¹ և «անղուսպ հայրենասեր» կամ, ինչպես նրան բնութագրում է զբաղարյան մեր վերջին հսկան՝ Արսեն Բագրատունին, Ալիշանը «մոգ մ'էր, Հայաստանի աստղը փնտրող մոգ մը»¹²:

Բայց, եթե մենք այսօր կարող ենք խոսել Ալիշանի մասին որպես բանաստեղծի, որպես պատմագիր-աշխարհագրի, որպես հմուտ մանկավարժի և աստվածավախ հոգևորականի՝ շնորհիվ Ս. Երեմյանի, Ա. Տերտերյանի, Ս. Շտրկյանի, Ա. Սարգսյանի, Բ. Սարգսյանի, Ա. Չոպանյանի, Կ. Քիպարյանի, Ս. Զեմեմյանի և ուրիշների աշխատությունների, ապա Ալիշան իմաստասերն ու Ալիշան բարոյախոսն այսօր էլ դեռևս մնում է «համեստ մանր-շակ մը՝ ծածկուած իր փրկունին տերևին տակը»¹³, չբացահայտված և չճանաչված, դրա պատճառները և՛ օբյեկտիվ են, և՛ սուբյեկտիվ: Պետք է խոստովանել, որ դրանում մեղավոր են նաև հայ փրկությունության պատմության ներկայացուցիչները: Մենք համակարծիք ենք «Ձայն Հայրենեաց»-ի հեղինակի հետ, որը դեռևս 1901 թ. հավատացած էր, որ «Մի օր այդ Հայրենիքը (հայ Հայրենիքը – Յու. Հ.) աւելի երջանիկ օրերու մեջ պիտի յիշէ իր յոգնաւաստակ զաւակներու անունները...»¹⁴: Անգամ այնպիսի մեծավաստակ դիտնականները, ինչպիսիք են Ն. Գաբրիելյանն ու Վ. Չալոյանը, չկարողացան ճիշտ դնահատել Մխիթարյանների իրական նշանակությունը հայ մշակութի պատմության մեջ: Ն. Գաբրիելյանը Մխիթարյաններին մեղադրում է քննադատական մտքի զարգացմանը խոչըն-

9 Ն. Գ. Գ. Բ. Ի. Ե. Լ. Ե. Ն. Հայ փրկությունական մտքի պատմություն. հ. 2, Երևան, 1958, էջ 346:

10 Ա. Ղ. Գ. Ի. Կ. Ե. Ն. Համառոտ գրական պատմութիւն նշանավոր Մխիթարեան հարց (Մխիթարեան հոբելեան) (1701–1901). Վենետիկ, 1901, էջ 80:

11 Ն. Մ. Կ. Ե. Լ. Ե. Ն. Հ. Ղևոնդ Ալիշան. Տեսուչ Փարիզի Մուրատեան վարժարանի, 1858-1861. Վենետիկ, 1980:

12 Ս. Ե. Բ. Ե. Ն. Նշվ. աշխ., էջ 184:

13 Նույն տեղում, էջ 180:

14 «Ձայն Հայրենեաց», 1901, Թիֆլիս, №112:

դոտելու և հինը փոխելու դեմ դուրս գալու, հայերի պատմական դերը չափազանցելու և առավելութունները գովերգելու մեջ, որով և, ըստ Գաբրիելյանի, Մխիթարյաններն ընկել են ազգային սնապարծության մեջ, հոգեկան սնունդ տալով «նացիոնալիզմին» և «կոնսերվատիզմին»¹⁵:

Միակ շեղումը խորհրդային տարիներին կատարեց Ալ. Թևոսյանը՝ անդրադառնալով միաբանության «հսկաներից» մեկի՝ Արսեն Բազրատունու¹⁶ փրկիսոփայության ուսումնասիրությանը: Այդ շրջանում, իհարկե, գրականագիտական աշխատություններ հրատարակվեցին, ընդ որում նաև Ալիշանի մասին, որոնցից հատկապես կուզենայի նշել ակադեմիկոս Արսեն Տերտերյանի և Սուրեն Շտիկյանի աշխատությունները¹⁷, սակայն Մխիթարյանների փրկիսոփայական հայացքներին անդրադարձ չկատարվեց: Դա հաճախ փորձում են բացատրել նրանով, որ իբր XIX դ. հայ իրականության մեջ «զուտ փրկիսոփայական բնույթի» աշխատությունները քիչ են¹⁸: Բնականաբար, հարց է ծագում, ասվածը վերաբերո՞ւմ է արդյոք Ալիշանին և կարելի՞ է արդյոք նրան ուսումնասիրել որպես փրկիսոփայի...

Ղ. Ալիշանի աշխատությունների քննական վերլուծությունը հիմք է տալիս պնդելու, որ այն չափորոշիչները, որոնցով դեկավարվելով մենք փրկիսոփաներ ենք համարում Պյութագորասին, Պլատոնին, Ցիցերոնին, Ե. Կողբացուն, Ա. Շիրակացուն, Հ. Սարկավագին և բոլոր նրանց, ովքեր փառաբանվել են իրենց իմաստությամբ, կրթվածությամբ և ապրելու արվեստով, նույն չափորոշիչներով փրկիսոփա է նաև Ալիշանը: Նա փրկիսոփա է նաև ժամանակակից չափորոշիչներով, այն է՝ երևույթների վերլուծության նրբությամբ և խորությամբ, մոտեցումների համընդհանրությամբ, դատողությունների տրամաբանությամբ, վերջապես, նաև աշխարհընկալման յուրահատկությամբ: Այո, Ղ. Ալիշանը փրկիսոփա է և միանգամայն ինքնատիպ փրկիսոփա, որի վկայությունն են նրա մեծ և փոքր կտավի բազմաթիվ աշխատությունները, առաջին հերթին նրա «Ընդ եղեևեալ» (1874 թ.) գրված գրաբարով, որը միայն 1931 թ. Վ. Հովհաննիսյանը թարգմանեց արևմտահայերեն. «Եղեևեին տակ: Խորհրդածություն մենաևոր բնութեան մեջ»: Այս թարգմանությունը հետագայում Ա. Շտիկյանը գետեղեց Ղ. Ալիշանի «Երկեր»-ի¹⁹ մեջ: Իրենց բնույթով փրկիսոփայական աշխատություններ են նաև «Հրահանգ, զբոսանք և սփոփանք հասարակաց»²⁰, «Ծանիր զքեզ»²¹, «Ազգային պակասութեանց և կատարելութեանց

15 Հ. Գ ա բ ռ ի ե լ յ ա ն. նշվ. աշխ., էջ 346:

16 Ա. Թևոսյան. Արսեն Բազրատունին որպես փրկիսոփա. — XIX դ. հայ փրկիսոփայական միտքը. Երևան, 1969, էջ 55–174:

17 Ա. Տերտերյան. Ալիշանը և հայրենասիրությունը (Հայ կյսիկներ). Երևան, 1944: Ս. Շտիկյան. Ալիշանի գեղարվեստական ստեղծագործությունը. Երևան, 1967:

18 Տես՝ Я. Х а ч и к я н. Об источниках армянской философской мысли XIX в. — Հայ իմաստասիրությունը հոգևոր մշակույթի համակարգում. Երևան, 1998, էջ 66–81:

19 Ղ. Ա լ ի շ ա ն. Երկեր. Երևան, 1981, էջ 297–351:

20 Նույն տեղում, էջ 203–222:

21 Նույն տեղում, էջ 129–135:

վրայ»²², «Ազգային հատուկ դաստիարակություն»²³, «Ազգասիրություն»²⁴, «Յուզիկը Հայրենեաց Հայոց» աշխատության ընդարձակ «Առաջաբան» ու «Վերջաբան»²⁵, «Ուսումն հայրենեաց. բանախոսություն հայաստանի»²⁶, նշանավոր «Ճառը» և բազմաթիվ այլ հոդվածներ ու աշխատություններ:

Իմաստասիրական և բարոյախոսական բազմաթիվ աշխատություններ և խորհրդածություններ Ալիշանի մահվանից հետո մնացել են անտիպ, որոնց հրատարակման ազդեցություն գործը մեծ պատասխանատվությամբ ձեռնարկել են միաբանության անդամները: «Բազմավեպ» 1909 թ. երկրորդ համարից սկսած շարունակաբար հրատարակվեցին Ալիշանի «Առժամայն մտադրեցությունք» խորագիրը կրող իմաստասիրական խորհրդածությունները: Այդ անտիպ գրությունները, որոնք Ս. Երեմյանի վկայությամբ կազմում են մոտ 100 «փոքրագիր էջեր», ունեն նաև մեկ այլ խորագիր՝ «Օրագիր առժամայն ազգմանց մտաց եւ սրտի»: Այդ խորհրդածությունները սկսվում են 1841 թ. և որոշ ընդհատումներով շարունակվում են մինչև 1855 թ.²⁷: Սրանք փրկաստիպական խորհրդածություններ են Կյանքի և Մահվան, Գեղեցիկի և Բարու, Ճանաչողության և Ինքնակատարելության, Սիրո և Բարեկամության, Աղբի և Ազգասիրության, Հայրենիքի և Հայրենասիրության, Հավերժության և Անմահության, մարդկային արատների և դրանց հաղթահարման վերաբերյալ, որոնք ունեն նաև խիստ ընդգծված բարոյագիտական բնույթ:

Ալիշանը թողել է բազմաթիվ անտիպ աշխատություններ և հարուստ արխիվ, որտեղ քիչ չեն նաև փրկաստիպական-բարոյագիտական բնույթի աշխատանքները: Հոսով ենք, որ օրերից մի օր հայ հասարակությունը հնարավորություն կունենա ծանոթանալու նաև այդ աշխատությունների հետ:

«Ընդ եղեւնեալ»-ի առաջաբանում Վ. Հովհաննիսյանը գրում է. «Շատերը լսած են և քիչերը թերևս ճշակած Ալիշանի այս փոքրիկ, բայց ոսկեղնիկ դուխգործոց գրքոյկը: Տաք և հոգեխոով խոսակցություն մը բնութեան և բանաստեղծին միջև, ու Նահապետին ալեկոծված ներաշխարհն ի հայտ կուղա իր ամբողջ տենչանքներով եւ բարդութիւններով... Ընդ եղեւնեալը երկնքի խորութիւնն ունի, հողույ աղաղակը և ճշմարտութեան վեպն է բնութեան մեջ դրված»²⁸:

«Ընդ եղեւնեալ»-ը գրված է միջնադարյան իմաստասիրական գրականության սկզբունքներով, փրկաստիպական մենախոսության ձևով: Այս սկզբունքը մշակվել է դեռևս Օդոստինոսի, Բոսցիոսի, Անսելմի, Արելյաբի, Նարեկացու և այլ մտածողների մոտ: «Ընդ եղեւնեալ»-ը խոստովանութ-

22 Նույն տեղում, էջ 170-176:

23 Նույն տեղում, էջ 156-165:

24 Նույն տեղում, էջ 176-181:

25 Հ. Ղ. Մ. Ա լ ի շ ա ն. Յուզիկը Հայրենեաց Հայոց. հ. Ա. Վենետիկ, 1869, էջ 1-98, հ. Բ, 1870, էջ 567-572:

26 «Բազմավեպ», 1861, էջ 311-325, 347-357:

27 «Բազմավեպ», 1909, էջ 109:

28 Ղ. Ա լ ի շ ա ն. Եղեւնին տակ: Խորհրդածություններ մենաուր բնութեան մեջ. Վենետիկ, 1931, էջ 5:

յուն-մենախոսուծյունն է, բարոյական մաքրման և հրապարակային զղջումի գրականության հրաշալի օրինակ, որի նպատակը բարոյական կատարելագործումն է: Այստեղ հեղինակը իմաստասիրաբար խորհրդածում է Բնության, Կյանքի ու Մահվան, Մարդու և Հասարակության, Տիեզերական արարչագործության ու կամքի ազատության հարցերի շուրջը...

Ալիշանի իմաստասիրությունը բազմաչերտ է: Հետևաբար, նրա փիլիսոփայական աշխարհայացքի մասին ամբողջական պատկերացում կազմելու համար անհրաժեշտ է քննել այն իր բոլոր շերտերի մեջ: Տիեզերքի, Բնության, Մարդու, ինչպես նաև, Կյանքի և Մահվան, Հոգու և Անմահության հարցերի շուրջը խորհրդածելիս Ալիշանը հանդես է գալիս որպես կրոնափիլիսոփա և աստվածաբան: Մինչդեռ հասարակական երևույթների, Դաստիարակության, Բնության և Հասարակության, Ազգային խնդիրների շուրջը խոսելիս Ալիշանի փիլիսոփայության հիմքում դիտական աշխարհայացքն է, միանգամայն հակադիր աստվածաբանական իր ըմբռնումներին:

Ալիշանի փիլիսոփայական աշխարհայացքը մի կողմից արդյունք է Մխիթարյան միաբանության հոգևոր մթնոլորտի, միաբանության կամարների տակ թևածող ընդհանուր Ոգու, իսկ մյուս կողմից՝ եվրոպական և ազգային հասարակական-քաղաքական իրադարձությունների: Նա մի կողմից ապստամբ է ու խռովարար, որ Վենետիկի իրադարձություններով ոգևորված «Ի գէ՛ն ի վրէ՛ժ» է կոչում հայ երիտասարդությանը, իսկ մյուս կողմից՝ հաշտության և հնազանդության կոչեր է անում: Հատկապես կյանքի վերջին տարիներին, նա, ինչպես վկայում է ժամանակակիցներից Թադևոս Թոմաճանը, «Հաճախ խուցը քաշված կուլար՝ ինքզինք պատճառ նկատելով ազգին գլխուն եկած այդ մեծ աղետներուն»²⁹:

Այս միջավայրն ու իրադարձությունները չէին կարող իրենց ազդեցությունը չթողնել Ալիշանի փիլիսոփայական աշխարհայացքի վրա, որովհետև, վերջին հաշվով յուրաքանչյուր փիլիսոփայական տեսությունն, ինչպես ասում է Ֆիխտեն, ավելին չէ, քան է իր հեղինակը: Հետևաբար, հոգևորական միջավայրում ձևավորված Ալիշանի փիլիսոփայությունը չէր կարող լինել այլ բան, քան՝ կրոնափիլիսոփայություն, որովհետև, ինչպես իրավացիորեն նկատում է ակադեմիկոս Ա. Տերտերյանը, «վանքի խուցը... սոսկ Ֆիզիկական, աշխարհագրական հասկացությունն չէ, այլ նաև որոշակի մտայնություն, որոշակի գրական ուղղություն, մի հայտնի ոճ և այդ բոլորով հանդերձ՝ կյանքի նկատմամբ դիրքորոշում»³⁰:

Դեռևս XIX դ. կեսերին Մխիթարյաններին հաճախակի էին քննադատում ժամանակակից փիլիսոփայական տեսություններից հրաժարվելու և միջնադարյան փիլիսոփայական ավանդույթներին ու սկզբունքներին հետևելու համար: Ալ. Երիցյանը մեղադրում է նրանց, որ «Վենետիկի պատուելի հայրերը ոչ մի քայլ չեն արած ծանոթացնելու ազգին՝ գեմանացի կամ Ֆրանսիացի նորագոյն փիլիսոփայութեանը, բայց տուել են մեզ Կիկե-

29 Թ. Թ ո մ ա ճ ա ն. Հուշեր և նիշեր Հ. Ալիշանի ներքին կեանքին. - Ալիշանը ժամանակակիցների հուշերում. Երևան, 1974, էջ 205:

30 Ա. Տ եր տ եր յ ա ն, նշվ. աշխ., էջ 61:

րոնի, Սենեկայի և Պղատոնի հատուկտոր գրուածքները»³¹: Մինչև 1882 թ. Վենետիկի Մխիթարյանները հրատարակել են 630 անուն կամ 832 հատոր գիրք, որից 63 անունը զուտ իմաստասիրական է կամ բարոյագիտական, սակայն դրանց մեջ չկա ժամանակակից հեղինակների որևէ գործ: Այդ հրատարակութունների մեջ կա նաև տրամաբանության երեք գիրք, որոնք, Երիցյանի բնութագրմամբ, շատ են հնացած. «Թողնում ենք բանասերներին գատել, թե մեր օրերում որ աստիճանի նպատակահարմար է տրամաբանութեան մի դասագիրք, որ գրուած է Գեգելի ծնուելուց առաջ»³²:

Ալ. Երիցյանն, անկասկած, իրավացի է, երբ պահանջում է, որ Մխիթարյանները պատշաճ ուշադրություն դարձնեն ժամանակակից փիլիսոփայական տեսություններին: Սակայն Երիցյանն անիրավացի է նաև իր մեղադրանքների մեջ, որովհետև Մխիթարյաններից պահանջում է մի բան, որը նրանց ծրագրերից դուրս է և, գեո ալելին, դեմ է իրենց աշխարհայեցությանը: Նախ, եթե մենք անրնգունելի ենք համարում միջնագարյան փիլիսոփայությունը հատուկ հետադարձության սկզբունքը, համաձայն որի ճշմարիտ է այն ամենը, ինչը հին է, նույն տրամաբանությամբ էլ կարող ենք պնդել, որ ճշմարիտ է այն ամենը, ինչը գալիս է նոր փիլիսոփայությունից, քանի որ փիլիսոփայության մեջ չի գործում կոմունիստիվության սկզբունքը: Ի տարբերություն գիտության, փիլիսոփայության մեջ նոր տեսությունները կարող են ոչ միայն չօգտագործել նախորդ փիլիսոփայության ձեռքբերումները, այլև՝ կարող են արմատապես մերժել դրանք: Համենայն դեպս մի բան պարզ է, որ եթե չլինեք Կանտը, չէր լինի նաև կանտականությունը, ի տարբերություն գիտության, որտեղ եթե չլինեք Նյուտոնը կամ Էյնշտեյնը, միևնույն է, վաղ թե ուշ կատարվելու էին նրանց հայտնագործությունները: Հետևաբար, յուրաքանչյուր փիլիսոփայական տեսություն ճշմարիտ է մասամբ, որպես իր դարաշրջանի և իր ազգային կեցության արտացոլում և ընդհանրացում: Ուրեմն, անկախ մեր դիրքորոշումներից, յուրաքանչյուր փիլիսոփայություն ունի գոյություն իրավունք:

Մխիթարյանների փիլիսոփայությունը կրոնական է և նրանց մտածողության և աշխարհայեցողության վրա իշխողը արիստոտելականությունն է, որը գալիս է Մխիթար Աբաստացուց: «Մխիթար աբբան փիլիսոփայության մեջ (բարոյական և քաղաքական) հետևել է Արիստոտելին»³³, — գրում է Հովհաննես Ալանը: Ընդ որում, մեր կարծիքով, իշխողը եղել է ոչ թե մաքուր արիստոտելականությունը, այլ՝ արիստոտելականությունը հայրաբանական-ջատագովական և հատկապես՝ թովմա Աքվինացու մեկնաբանությամբ:

Մխիթարյանների և հատկապես Ալիշանի փիլիսոփայական աշխարհայեցության ձևավորման վրա իր ազդեցությունն է թողել նաև միջնադարյան հայ փիլիսոփայությունը, հատկապես՝ Դավիթ Անհաղթի, Ներսես

31 Ա լ . Ե ր ի ց Ե ա ն . նշվ. աշխ., էջ 95:

32 Նույն տեղում:

33 Հ. Յ. Ա լ ա ն . Մխիթարեանք գրականութեան հանդես (1701-1901). Վենետիկ, 1902, էջ 17:

Շնորհալու, Հովհաննես Սարկավազի և այլոց փիլիսոփայական հայացքները: Նրանց փիլիսոփայական հիմնական սկզբունքներից մեկը հետադարձ ու ճակատագրական սկզբունքն է, որն ասում է. «Ուրքան հին, այնքան իսկական, իսկ ինչքան իսկական, այնքան՝ ճշմարիտ»: Եվ քանի որ ամենահինը Աստվածաշունչն է, որն իր մեջ հավաքել է բոլոր ճշմարտությունները և մարդկությունը հաղորդակից է դարձրել աստվածային խոսքին և երանությունը, ուրեմն, պետք է վստահել միայն նրան: Ծիշտ է, «իմաստասերների մի ամբողջ դասակ», ընթացել է մարդկության «կեռման աշատ»՝ ճանապարհներով, որպես «առաջնորդ և միջնորդ ռամիկ բազմություն համար՝ գտնելու և ցույց տալու կյանքի ճանապարհը»: Սակայն ճշմարտության այդ որոնողները փոխանակ «հեռացնելու տգիտություն ինքնածին բույսը», աճեցրեցին «մոլորության կամավոր տունկը»: Եթե անգամ նրանք տեսնում էին որոնվող ճշմարտության «նշույլները», ապա ղրանց դեմ «բարբառելով» նրանք ավելի դեպի «ստությունն էին դիմում», որի արդյունքում նրանք «ոչ իսկական ճշմարտությանը հասան և ոչ էլ կարողացան այն ճշտորեն արտաբերել»³⁴: Ալիշանը ոչ թե մերժում է գիտական ճանաչողության հնարավորությունը, այլ՝ վիճարկում է դիտական ճշմարտությունների բարոյական արժեքը, այնպես, ինչպես իր ժամանակին գիտությունն ու արվեստները քննադատում էր Ժ.-Ժ. Ռուսոն:

Մարդկությունը հայտնի իմաստուններից և ոչ մեկը չկարողացավ համարձակորեն և ի լուր աշխարհի հայտարարել, թե ես բացահայտել եմ ճշմարտությունը և կարող եմ ցույց տալ ճշմարտության ճանապարհը, և դա միանգամայն բնական է, ասում է Ալիշանը, որովհետև փիլիսոփայությունը չկարողացավ հիպոթեզներից և կարծիքներից հեռուն գնալ... Այգ պատճառով էլ «Փիլիսոփաների, մոգերի և քրմերի բոլոր ճեմարաններն ու լսարանները... խորտակվում են և լուռության ու արհամարհանքի են դատապարտվում»³⁵, որովհետև նրանցից յուրաքանչյուրը որոնում է ճշմարտությունը՝ չհավատալով այն գտնելու հնարավորությանը:

Որպես աստվածաբան-փիլիսոփա, Ալիշանը պաշտպանում է Տիեզերքի, Բնության և Մարդու արարչագործության տեսությունը: «Դու ալ, բնությունն ալ ստեղծված եք արարչեն»³⁶, – ասում է նա և զարմանում է, որ որոշ իմաստասերներ չեն ընդունում այս ճշմարտությունը: Որովհետև նրանք չեն կարողանում ըմբռնել, թե այս անսահման բնությունը ինչպե՞ս կարող է արարված լինել, մոռանալով, որ «այս ահեղ ընդարձակ բնությունն՝ որ տեսած և չտեսած տիեզերքը կբովանդակե, կետ մ'է ստեղծողին առջև», ինչպես որ «մարդս ալ կետ մ'է բնության մեջ, բայց բնության տիրող կետն է»³⁷, քանի որ ստեղծված է Աստծո պատկերով և Աստծո նմանությամբ: Նա ստեղծված է որպես տեր և ոչ որպես բռնավոր, այդ պատճառով էլ նա բնության «մեկ մասին իշխանաբար կհրամայե՝ իրեն պիտո-

34 Ղ. Ա լ ի շ ա ն. երկեր, էջ 312:

35 Նույն տեղում, էջ 314:

36 Նույն տեղում, էջ 205:

37 Նույն տեղում:

յիցը ծառայեցնելու, մեկ այլ մասին մտոք կ'իշխե, անոնց օրենքները քննելով կամ վրանին զվարճանալով»³⁸:

Ըստ Ալիշանի, Արարիչն աշխարհն ստեղծել է միմյանց հակադիր Լույսի ու Ստվարի, Բարու և Չարի, Կյանքի ու Մահվան հակոտնյա ուժերից: Հակոտնյա տարրերից է ստեղծել նա նաև մարդուն. մի կողմից «տիեզերական փոշի», որի հիմքում ընկած է «Ոչինչը», թեկուզ և այնպիսի «Ոչինչը», որն իր մեջ կրում է «ինչ-որ բանի» վերածվելու հնարավորությունը, իսկ մյուս կողմից՝ Բանականություն և Ազատ կամք: Մարդկանց անհավանական է թվում, որ բնությունն արարչագործվել է «ոչնչից», ասում է Ալիշանը և դա այն պատճառով, որ դեռևս հեթանոս իմաստասերներն այն կարծիքին էին, թե «Ոչնչից ոչինչ չի առաջանում»: Նրանք մոռանում են, որ ինչն անիրականանալի է մարդու համար, հնարավոր է Աստծո համար և զարգացնելով Օդոստինոս Երանելու միտքը, թե «Աստված հենց այն պատճառով էլ Աստված է, որ ոչնչից ստեղծում է ամեն ինչ»³⁹, Ալիշանը գրում է. «Միայն Աստված է, որ կարող է աստվածային բաներ անել»⁴⁰:

Այդ «Ոչինչը» մարդն ամբողջ կյանքում կրում է իր մեջ, որից և բխում է նրա անկատարությունը, որն արտահայտվում է նրա փոփոխականությունով, ճանաչողության սահմանափակությունով և առաքինության սլակասով: Ասկայն, ինչպես հայրաբանության խոշոր ներկայացուցիչներից Թեոֆիլը, այնպես էլ Ալիշանը համոզված է, որ վիճակն այնքան էլ անհուսալի չէ, քանի որ մարդն «Ոչնչի» հետ մեկտեղ իր մեջ կրում է նաև աստվածային կայծը՝ բանականությունն ու ազատ կամքը, որոնց շնորհիվ նա ճիշտ ընտրություն է կատարելու, ճանաչելու է աստվածային օրենքները և ապրելու է համապատասխան այդ օրենքների:

Եթե մարդն արարչագործություն արդյունք է, ապա ազգերը, ըստ Ալիշանի, արդյունք են իրենց բնություն: Ազգերի և ժողովուրդների մասին խոսելիս նա ելնում է աշխարհագրական գեոտերմինիզմի սկզբունքներից: Այստեղ աստվածաբան-հոգևորականին փոխարինելու է դալիս դիտանական-փիլիսոփան: Նա երկնքից իջնում է երկիր... նրա ուսուցիչներն արդեն ոչ թե միջնադարյան հայրաբանության ներկայացուցիչներն են կամ Աստվածաշունչն է, այլ՝ Հիպոկրատեսը, Հերոֆոտոսը, Մոնտեսքյուն, Հեգելը, Բոկլը, Հ. Թենը և ուրիշներ, ովքեր մշակեցին աշխարհագրական գեոտերմինիզմի տեսությունը, այսինքն, ովքեր մշակեցին օբյեկտիվ գործոնների աշխարհագրական միջավայրի, կլիմայի, ռելիեֆի ազդեցության մասին տեսությունները հասարակության ձևավորման և հետագա զարգացման վրա: «Յայտնի է ամենուն թե ինչ ազդեցություն ունին կլիմայը՝ տեղացեաց վրայ. ինչպես սաստիկ տաք կամ ցուրտ երկրի բնակիչը՝ տկար և ջլատեալ կ'ըլլան. ինչպես բարեխառն կլիմայից բնակիչը՝ ավելի բարեկեցիկը, բարեբնոյթը և կիրթը. չափավոր ցրտութեան տակ եզոդը՝ աւելի ժիր կ'ըլլան. չափաւոր տաքութեան տակ եզոդքն այլ աւելի զուարթ և զբոսասեր, ինչպես գաղղիացին, միդամածք երկրի բնակիչը՝ իրենց վարուց վրայ

38 Նույն տեղում, էջ 206:

39 Г. Г. Маёров. Формирование средневековой философии. М., 1979, с. 70.

40 Ղ. Ա. Ի. շ. ան. Երկեր, էջ 321:

այլ միգրյան քող մը կ'երեւցնեն, մելամաղձ եւ ծանրաբարոյ կ'ըլլան, ինչպէս Անգղիացիին և Իռլանդացիին: Այսպէս եւ գուցե այլ աւելի, երկրին կազմուածքն եւ դիրքն ունին տպաւորութիւն ի վերայ բնակչացն»⁴¹, – գրում է Ալիշանը:

Բնակիչները վրա ազդում է ոչ միայն տվյալ երկրի կլիման, այլև՝ երկրի կառուցվածքն ու դիրքը: Աշխարհագրական միջավայրի տարբերություններով է պայմանավորված նաև գործունեության բնագավառների, կենցաղի, սովորությունների, ավանդույթների, ինչպէս նաև ազգային հավատալիքների տարբերությունները: Արվեստների ներշնչողը նույնպէս հայրենի բնութիւնն է. «Յունաց և Իտալացվոց այնչափ գերազանցութիւն ի գեղարուեստս՝ առաջին վարպետ եղած է իրենց հայրենի երկրին բնութիւնն. բարեխառն կլիմայն, դալար բուսաբերութիւնն, զանազանութիւն կամ ելեւէջք դրից, և ծովն»⁴²: Ալիշանը ծովը համեմատում է «այն ծեր և ալեզարդ մեծ վարժապետի հետ», որն իր «ահեղ ձայներն աւելի՛ իր կերպուկերպ ծփանոքն» զարմանալի ազդեցութիւն է ունեցել և այժմ էլ ունի հույնի, անգլիացու, վենետիկցու և մյուս ազգերի վրա, ում երկիրը «բաղդաւոր եղեր է» իր սահմանների մի մասով սահմանակից լինելով ծովին:

Հայ ժողովուրդն արդյունքն է Հայկական լեռնաշխարհի. հայի կազմախոսութիւնն ու հոգեգծերը ձևավորվել են Հայաստանի բնութիւնն ու կլիմայի ազդեցութեամբ: Դրանցով է պայմանավորված նաև նրա էութիւնը հակասականութիւնը. «Երկու հակադեմ կլիմայք կ'երևին մեր երկրին մեջ. սաստիկ ցրտութիւն եւ սաստիկ տաքութիւն: Ինչպէ՞ս բնակելու է սասանկ երկրի վրայ: ... Մեր հարքն ու մեր եղբարքն անգամ, շատ տեղ գետնի վրայ չէին բնակեր ուրիշ աշխարհաց բնակչաց նման, գոնե տարւոյն երկու ծայրահեղ եղանակաց ատեն, այլ անկե վար կամ անկե վեր, այսինքն, ձմեռն՝ երկրին երեսաց տակ, կես գետնափոր տանց մեջ, նման իմն հողաթմբեր կենդանեաց. իսկ ամառն՝ այլ աւելի վայելչապէս, երկրիս սովորական երեսն վեր, օդասահման կենդանեաց եւ թռչնոց հետ. կամ լեռանց եւ սարից վրայ, կամ ծառոց եւ ձեռակերտ բարձրավանդակաց վրայ...»⁴³: Բնական այդ գործոնները եղան հայ ժողովրդի ձևավորման հիմնական տարրերը և ոչ թե կրոնական պատկանելութիւնը, ինչպէս մտածում էին որոշ մտածողներ նույնիսկ XIX դ. երկրորդ կեսերին... Չնայած հավատալիքների, սովորությունների և հոգևոր այլ գործոնների կարևորութիւնը, ըստ Ալիշանի, այնուամենայնիվ, առաջնայինը դրանք չեն: «Երբ Հայկայ և Վահագնի օրերուն խորհրդակատար քրմապետաց տեղ փոխանակեցին խաչապսակք քահանայապետք, մեհենաց վրայ եկեղեցիներ կանգնեցին», ազդն իր բնութիւնը չփոխեց, մնաց նույն ազգը, քանի որ «անոնց չորս դին և դուրսը նոյնպէս մնաց, բնութիւնն իր կերպարանքը չփոխեց, ազգն իր հանդեսները չփոխեց»⁴⁴, – գրում է Ալիշանը: Այսինքն, ազգային բնութագրերը պայմանավորված է ոչ թե կրոնական հավատալիքներով, այլ՝ աշխարհագրական այն միջավայրով, որի վրա ձևավորվել է, ապ-

41 Հ. Ղ. Մ. Ա լ ի շ ա ն. Յուրիկք..., հ. Ա, էջ 9-10:

42 նույն տեղում, էջ 10:

43 նույն տեղում, էջ 270:

44 նույն տեղում, էջ 294:

րել, ստեղծադործել ու մաքառել է տվյալ ժողովուրդը: «Հայաստան ընդիմակներու երկիր մըն է գերագանց աստիճանի, որ քիչ ազգեցուծիւն չեն ըներ իր ընակչաց ըրոյիցը վրայ», – ասում է Ալիշանը Մուրազյան վարժարանի պարգևաբաշխութան օրը աշակերտներին ուղղված իր «Ճառ»-ի մեջ⁴⁵: Օտարը կարող է նաև չսիրել «ընդգիմակներու» այդ երկիրը, մինչդեռ այն միշտ էլ սիրելի է իր ժողովրդի համար, որովհետև հայրենիքը սիրելի գարձնողը բնությունը չէ, այլ հայրենիքն է, որ սիրելի է գարձնում բնությունը. «Ա՛հ, երբ սիրելի կ'ըլլան հայրենիք, ամեն եղանակներն ալ գեղեցիկ կ'ըլլան, և վայրենագոյն բնութիւնն անդամ կը քաղցրանայ բարեկիրթ սրտի մը»⁴⁶:

Եվրոպայում սկիզբ առած ազգային–ազատագրական շարժումները արթնացրեցին նաև Արևելքը: Ազգային զարթոնք և մշակութային վերածնունդ ապրեց նաև Հայ ժողովուրդը: Մխիթարյանները, լինելով եվրոպական իրադարձությունների կիզակետում, չէին կարող չարձագանքել այդ շարժումներին: Այդ իրադարձությունները խորը ազդեցություն ունեցան երիտասարդ Ալիշանի հայացքների ձևավորման վրա: Պատահական չէ, որ Վենետիկի հեղափոխության օրերին ծնվեցին նրա ամենավառ, մարտակոչ հիշեցնող բանաստեղծությունները, որոնք հետագայում գետեղվեցին նրա «Նուադներին» «Հայրունի» հատորի մեջ, որի «Առաջաբանում» Կյուրեղ Քիպրյանը հետագայում գրում է, որ Ալիշանի անունը երկար ժամանակ «եղած է մարմնացում և խորհրդանիշ հայրենիքի սիրոյն և ազգային արժեքներու»⁴⁷:

Ազգի հիմնական բնութագրիչները Ալիշանը համարում է ոչ թե կրոնը, այլ լեզուն և սովորույթները: Իսկ քանի որ սովորույթները կարող են նաև փոփոխվել ժամանակի ընթացքում, ուրեմն, ազգի հիմնական բնութագրիչը մնում է լեզուն: Ըստ նրա, ազգի մասին առաջին պատկերացումները մարդն ստանում է ճանաչելով իրեն: Նա տեսնում է, որ ինքը որպես մարդ «ամեն մարդու հավասարակից է, բայց ամենքն ալ իրմե զատ-զատ մարդիկ են»: Այդ նույն տրամաբանությամբ էլ նա հանգում է այն եզրակացությունը, որ մարդկային բազմության մեջ կան բազմաթիվ մարդիկ, «որք նման են իրեն այն ամեն բաներով որով որ ուրիշներու չեն նմանիր»⁴⁸: Հետևաբար, ըստ Ալիշանի, ազգը «միություն է այնքան մարդկանց, որ մեկ նահապետե մը առաջ եկած են, մեկ հայրենի լեզու ունին, նման բնավորություն ունին և շատ հեղձ նույն կրոնք, նույն օրենք, նույն վիճակ»⁴⁹: Իհարկե, ցանկալի կլինեն, եթե ազգը կազմող անդամները ունենային նաև նույն կրոնը, նույն օրենքներն ու նույն վիճակը: Սակայն արտաքին պատճառներով պայմանավորված նմանատիպ տարբերությունները չպետք է խանգարեն մեր ազգային միասնությունը, որի առաջին պայմանն ազգասիրությունն է: Այդ երևույթի մասին հատկապես շատ է խոս-

45 Հ. Ղ. Ա լ ի շ ա ն. Ուսումն հայրենեաց. – «Բազմավեպ», 1861, էջ 312:

46 Նույն տեղում, էջ 313:

47 Կ. Ք ի պ ա ը յ ա ն. Առաջաբան. – Ղ. Ա լ ի շ ա ն. Հայրունի (հատվածներ). Վենետիկ, 1944, էջ 7:

48 Հ. Ղ. Մ. Ա լ ի շ ա ն. Յուշիկք..., էջ 2:

49 Ղ. Ա լ ի շ ա ն. Երկեր, էջ 177:

վում հիմա՝ մեր օրագրերի մեջ և «բերնե բերան անցնելով քանի մը տարիե ի վեր, մոգական կամ ալքիմիական բառ մը դառնալ կսկսի. շատ տեղերե ալ նույն ձայնը ելլելով, երբեմն լսողին գլխուն շփոթութիւն ալ բերելու պատճառ կըլլա», – ասում է Ալիշանը⁵⁰:

Ազգասիրութիւնը երկու բառերից է կազմված՝ ազգ և սեր, որտեղ ազգը հանգես է գալիս որպէս այն կալը, որից կերտվել-ստեղծվել է ազգը և սերը՝ որպէս կրակ, որով թրծվել է հայ կալից կերտված դուրսագործոցը, որպէսզի լինի ավելի ամուր և ավելի կայուն: Հետագայում Գարեգին Նժդեհը Ալիշանի ազգասիրութիւնն ունեւորպէս ելակետ, երբ ստեղծեց ցեղակորնութիւնը՝ որպէս տեսութիւն և որպէս շարժում (ցեղ-ազգ և կրոն-սեր): Նույն կալից պատրաստված մարդկանց պարտքն է, որ սիրեն իրար: Այդ սերը Ազգասիրութիւնն է, ասում է Ալիշանը և միաժամանակ նաև դժգոհում է, որ կան բազմաթիվ մարդիկ, ովքեր վախենում են նույնիսկ այդ բառի կիրառումից: Նրանց թվում է, որ ազգասիրութիւնը դեմ է մարդասիրութիւնը: Այս տեսակետը դալիս է «Շնական ըսված փիլիսոփայութենէ», – ասում է Ալիշանը: Նրանց մասին է, որ նա դրում է, թէ սուտ է այն փիլիսոփան, որ «ազգասիրութիւնը մարդասիրութիւնը դեմ կկարծե, որ հայրենիքը հերձված կսեպե երկրես, և կըսես. բոլոր երկիրս ալ հայրենիք է լավ մարդու, ինչպէս թռչունին՝ բոլոր երկինքն և ձկան՝ բոլոր ծովը»⁵¹: Մինչդեռ, ինչպէս մարդասիրութիւնը, այնպէս էլ ազգասիրութիւնը բնական «պատվեր»-ներ են և նրանց «պարտքը» դնողը ամենևին էլ փիլիսոփաները չեն, բնութիւնն է, միայն այն տարբերութիւնը, որ եթէ մարդասիրութիւնն «ընդհանուր պատվեր» է, ապա «ազգասիրութիւնը մասնավոր պատվեր է»: Եթէ «մարդասիրութիւնը մեզի կսորվեցնե զամեն մարդիկ սիրել, վասնզի մեզի նման են», ապա «ազգասիրութիւնը զազգայինները ավելի սիրել կսորվեցնե, վասնզի ավելի նման են մեզի»⁵²: Հետևաբար, ազգասիրութիւնը ոչ միայն չի հակադրվում մարդասիրութիւնը, այլ՝ ավելի է հաստատում այն, որովհետև «իր ազգը չսիրողը հավիտյան մարդասեր չըլլար», քանի որ, եթէ «կրակը մոտինները չտաքցներ, հեռվինները ինչպէս կտաքցներ»⁵³, ասում է Ալիշանը:

Ալիշանը երազում էր իր ազգն ու հայրենիքը տեսնել «կատարյալ ու նախանձելի»: Նա երազում էր այն օրվա մասին, երբ կկարողանար ասել. «Ասիկա մեր հայրենական կալուածն է, զոր սեփական օրինոք և քաղաքավարութեամբ պահեր են նախնիքս իր հին սահմանաց մեջ, ի միջի ուրիշ սահմանաց և ազգաց»⁵⁴: Աշխարհագրական այդ տարածքները, ժամանակի ընթացքում, դառնում են հայրենիք, ոչ այն պատճառով, որ այնտեղ ապրում են և մեծամասնութիւն են կազմում այս կամ այն ազգի ներկայացուցիչները: Նման բնութագրումը հայութիւնը չի վերաբերում, որովհետև, ինչպէս նկատում է Ալիշանը, դեռևս քրիստոնեութիւն ընդունման ժամանակներից, հայ ժողովուրդը զանգվածաբար հեռացել է իր պատմա-

50 Նույն տեղում, էջ 176:

51 Նույն տեղում, էջ 177:

52 Նույն տեղում, էջ 179:

53 Նույն տեղում, էջ 177:

54 Հ. Ղ. Մ. Ա լ ի շ ա ն. Յուրիկք..., էջ 12:

կան հայրենիքից և անհիշելի ժամանակներից հայ ազգը «չատ ընդարձակ և անհուն երկրի երես սփրուված կու տեսնեմք», հետևաբար, մեր հայրենիքն այնտեղ է, որտեղ մեր ազգակիցների «ծնարանքն և քնարանքն են», որտեղ կայացել է ազգի բարոյական կյանքը, որտեղ աշխատել, արարել և հող են դարձել ազգի անդամները: Հետևաբար, «աւելի կերպով մը հոն են հայրենիք ուր որ մեր արենակիցք և լեզուակիցք գործեր են»⁵⁵, և իրենց գործունակութեամբ մշակել, վերափոխել և վերակառուցել են այն իրենց հոգևոր-բարոյական առանձնահատկություններին համապատասխան: Հետևաբար, «Ով որ անտարբեր է դէպ ի հայրենիքը, ան իրաւունք չունի ընկերութեան մեջ ապրիլ, դուրս պետք է ելել յազգես ի բնաւ իսկ մարդկանէ, յանտառս յանապատս ի սառնամանիս դիցե գրոյն իւր»⁵⁶, – գրում է Ալիշանը:

Յուրաքանչյուր ազգ իր երկրի, իր բնութեան արդյունքն է, հետևաբար, անկախ երկրի ճակատագրից, այն միշտ էլ սիրելի է իր ժողովրդի համար: Ինչպես որ մեր ծնողներին սիրելի դարձնողը նրանց հարստութիւնը կամ փառքը չէ, այնպես էլ հայրենիքն ու ազգը ոիրելի դարձնողը նրա բնութիւնը կամ ճակատագիրը չէ, ասում է Ալիշանը: Ի՞նչ են ասում այն մարդուն, որը չի սիրում իր ծնողներին՝ պատճառ բերելով նրանց աղքատութիւնը կամ խեղճութիւնը, կամ հիվանդութիւնը: «Մարդ չէ, գազան է կրսենք», – ասում է Ալիշանը: Նրա կարծիքով, «Ազգը չսիրելի, իր ծնողները չսիրելեն վար չմնար», որովհետև եթե մենք սիրում ենք մեր ծնողներին, որոնք կյանք են տվել մեզ, ուրեմն, մենք պարտավոր ենք սիրել մեր ազգին, քանի որ նա է ծնողը մեր ծնողների. «Մեր ազգն է մեր հայրերուն հայրը. Մեր ազգն է զմեզ մեզի տվողը», հետևաբար անիրավ է իր ազգը չսիրողը և ավելի անիրավ է «հայ մը թե որ ազգը հայ ըլլալուն համար չսիրեր»⁵⁷:

Իմաստուններից մեկն ասել է. «Ըստ երևույթին ամենադժբախտ ազգերը ավելի են սիրում իրենց հայրենիքը»: Այս բանաձևը ընդունելի է Ալիշանի համար. նա մեծ սիրով է սիրում իր ժողովրդին և իր հայրենիքը և այդ նույն սերը քարոզում է բոլորին, երբեք չչափազանցելով իր սիրո մեջ, որովհետև հայրենասիրության և ազգասիրության մեջ չափազանցումը կարող է վնասել հայրենիքի շահերին: Պատահական չէ, որ նա դեռևս 1848 թ. իր հոգևածներից մեկում գրում է. «Ու իրը հայրենասիրութեամբ եթե վնասե հայրենյաց թող կապեսցեն արկցին զիս ի ծծնբահոտ վիհս Մասնաց, անգ քավեցից զառավել սիրոյն իմոյ մեղանս»⁵⁸:

Ազգասիրութիւնը և հայրենասիրութիւնը պետք է լինեն արդարացի, որի համար անհրաժեշտ է, որ «սրբենք մտաց աչվնիս, որ չլլա թե տգիտութեամբ և վատութեամբ մթնած՝ չտեսնե անոր դեղեցիկ ձիրքերն ալ, կամ չլլա, որ չլացութեամբ, որ է չափազանց տեսութիւն, տեսածներնուս կերպարանքն այլայլե և սեն ալ ճերմակ տեսնենք»⁵⁹: Այս երկու տեսակ

55 Նույն տեղում, էջ 6:

56 «Բազմավեպ», 1843, էջ 181:

57 Ղ. Ա լ ի շ ա ն. Երկեր, էջ 179, 180:

58 Նույն տեղում, էջ 180:

59 Նույն տեղում, էջ 170:

մտածողներն էլ կարող են լինել, ասում է Ալիշանը, նրանք կան նաև մեր ազգի մեջ և, կարելի է ասել, որ երկուսն էլ հավասարապես վտանգավոր են: Եթե նրանցից առաջինները «հայու ազգը ցած, անարգ, սինլքոր, կոշտ, սև բան մը կսեպեն», որն սպառել է իրեն և պատմության մեջ այլևս չունի որևէ կատարելիք գործ, ապա երկրորդները «տեսակ մը հպարտ և համառ ազգասիրությունը չեն ուզեր, որ մեկ կերպով մը ազգին դիպչվի, ազգին վրա արատ մը գրվի, իբրև թե ազգը սիրելը անոր պակասություններն ալ պաշտել ըսել է, մեկեն ազգը պաշտպանենք ըսելով՝ անոր պակասություններն ալ կպաշտպանեն, առանց իմանալու, կամ իմանալով»⁶⁰: Ալիշանն ըմբռնում է այս երկու մոտեցումների վտանգավորությունը և եզրակացնում, որ եթե իսկապես խելացիություն է «ազգին պակասությունը պարտկել», ապա պակասությունը չճանաչելը «մեծ սխալություն է», քանի որ առանց ազգի թերություններն ու պակասությունները ճանաչելու, հնարավոր չէ նրան վերափոխելը և կատարելագործելը: Նա համոզված է, որ ինչպես «բուն զմարդն մարդ ընողն է ինքզինքը ճանչնալը», այնպես էլ ազգին ազգ դարձնողը պետք է լինի ազգի ինքնաճանաչումը, որն այլ բան չէ, եթե ոչ ազգի պատմության՝ նրա ծագման, պայքարի, մաքառումի և գոյատևման պատմության իմացությունը: Ազգասիրությունը շատ լավ բան է, սակայն «ճշմարտությունն դուրս չելելըն ամենեն լավն է և ազգասիրությունեն ալ դուրս չէ»⁶¹, — ասում է Ալիշանը և իր միտքն ավելի համոզիչ և ազդեցիկ դարձնելու նպատակով բերում է խիկար իմաստունի միտքը, թե «Ազգին վրա փոշի մը չնստեցնել ուզելն՝ ազգը քարկոծելու վտանգի մեջ ձգել է»⁶², որովհետև նման մոտեցման դեպքում, գիտակցաբար թե անգիտակցաբար մենք փակում ենք մեր աչքերը գոյություն ունեցող թերությունների ու պակասությունների հանդեպ, հնարավորություն տալով նրանց ավելի խորանալու: Պակասություններ ունեն բոլոր ազգերը, հետևաբար «մեծ անխելքություն է» պակասությունները չճանաչելը, որը հնարավորություն կտա ժամանակին ուղղելու դրանք:

Եթե որևէ հայ գտնում է, որ հայ ազգը զարմանալի կատարյալ, գեղեցիկ սովորույթներով զարդարված պետք է տեսնենք, բնական է, որ յուրաքանչյուր մարդ կարող է այդպես մտածել իր ազգի մասին: Բայց մենք գիտենք, որ յուրաքանչյուր ազգ իր գեղեցիկ և կատարյալ սովորությունների կողքին ունի նաև էական թերություններ ու պակասություններ: Ուրեմն, նույն ձևով էլ, եթե անգամ ոչ մենք, ապա ուրիշները տեսնում են մեր թերություններն ու պակասությունները, հետևաբար չպետք է հրաժարվել դրանցից, մանավանդ որ, հայ ժողովրդի թերություններն ու պակասությունները արդյունք են պետականության և ինքնուրույնության կորստի և ասիական վայրագ ժողովուրդների տիրապետության, հետևաբար շատ են սխալվում նրանք, ովքեր «որ ազգը կուզեն շարժել հանդիմանող, կծու ձայնով, կկարծեն, թե փոսը ընկած է՝ մը կվերցնեն հրելով, մշտելով, կանչվոտելով, հայհոյելով, այս բանս շարժելու տեղ ավելի կլիա-

60 Նույն տեղում:

61 Նույն տեղում, էջ 170:

62 Նույն տեղում, էջ 171:

ան, կկոտրեն ուժը, արդեն հիվանդ մարմինը ավելի կվատուժցնեն»⁶³, – ասում է Ալիշանը:

Եթե վնասակար է «ազդը միշտ վար գարնելը», նրան խարանելը, ապա օգտակար չէ նաև ազդը «միշտ գովելն ու գովելի ցուցնելն», քանի որ, եթե առաջին դեպքում կըլատվի, կկոտրվի ազդը, ապա անընդհատ գովելը «սիրտը կուռցնեն, միտքը կկուրացնեն, սնապարծ ազգասեր մը կընեն, օգու մեջ պարող մը, որ հաստատութուն չունի»⁶⁴, – ասում է Ալիշանը: Իհարկե, սոգը արթնացնելու և բարձրացնելու համար միանգամայն կարևոր է սիրտ տալը, ոգևորելը, «հուսո և գովության» խոսքեր ասելը, սակայն չի կարելի գուրս գալ ճշմարտության շրջանակներից և նախքան մեր ազդը «կատարյալ կամ առավելյալ» ներկայացնելը, անհրաժեշտ է սլարդել, թե հատկապես ինչը կարող է «պարծանաց» աղբյուր հանգիստնալ՝ քաղաքական գործությունը, գիտությունների գարդացումը, երևելի գործերի համբավն ու փառքը, հարցնում է Ալիշանը և պատասխանում է, որ «Դժբախտաբար ասոնցմե խիստ քչերը կտեսնենք հիմա»⁶⁵: Ինչի՞ վրա է «պարծենալիքնիս», եթե անցյալի վրա է, ապա անհրաժեշտ է, որ անցյալը ներկայից «զանազանենք», ու «ըսենք, թե ունեինք, թե չէ ունինք, քանի որ ունեցածը հիմք չէ ասելու համար, որ ունենք»: Մեր պապերի մոտ «ստակով լեցուն» կարասները մեզ չեն մխիթարում, «մեր աննման դյուցազունք և քաջերն և երևելի մարդիկը չեն կրնար մեր գերության և խեղճության վիճակը մեզի մոռցնել», քանի որ «բան ունենալը պարծելի չէ, հապա բանեցնելն և օգտակար ընելն»: Մոռուկներով սուր և պատերից հրացաններ կախված ունենալը գեռու ոչինչ չի նշանակում, եթե սնդուկի մեջ և պատից կախված լինելու պատճառով «ճանճ մ'ալ չես հայածած»⁶⁶, գրում է Ալիշանը: Արդարացի է նրա պահանջը, որ զենք ունենալը անհրաժեշտ է «գործածելով ցուցնենք», ինչպես արեցին Ավարայրի հերոսները, ինչպես արեցին Վենետիկի քաջ ապստամբները, հակառակ դեպքում ի՞նչ տարբերություն չունենալու և ունեցածը չօգտագործելու մեջ:

Հաճախ սեփական ազգային թերութունների և պակասությունների մասին խոսելիս մարդիկ կանգ են առնում ուրիշ ազգերի թերութունների և պակասությունների վրա: Նման մոտեցումը նույնպես վտանգավոր է և վնասակար, ասում է Ալիշանը: Նման մտածողները, որոնց Ալիշանը բնութագրում է որպես «կարծեցյալ ազգասերներ», «չեն կրնար հայու ազդը գովել կամ պաշտպանել, ինչվան որ կամ հոռոմը, կամ ասորին և կամ հրեայն վար չգարնեն»⁶⁷, պահանջում է, որ նախ «ցուցրնենք» մեր ձիրքերը, մեր առավելությունները և հետո միայն «սկսենք (թե որ կվայելե) մեր քովինները դատել»: Քննադատելով նման մոտեցումները, Ալիշանն իրավացիորեն նկատում է, որ «ուրիշի պակասությունը մեզի առավելություն մը չտար», հետևաբար, միանգամայն սխալ է, երբ «զհայր գովելու կամ պաշտպանելու ատեն հոռոմ մը, կամ հրեա մը, ասորի մը դիմացնին լու

63 Նույն տեղում, էջ 170–171:

64 Նույն տեղում:

65 Նույն տեղում:

66 Նույն տեղում, էջ 172:

67 Նույն տեղում:

մը կերևնա»։ Արդարությունը պահանջում է. «Թե որ հասակդ չափել կուզես, կանգունը վրադ դիր, քովինիդ վրա մի դիր», իսկ եթե ուզում ես երկուսիդ հասակն էլ չափել, ապա երկուսիդ համար էլ միևնույն «կանգունը բանեցուր»⁶⁸։

Անկասկած, իրավացի է Բարսեղ Աարդսյանը, որ «Ալիշանը ազգային բանաստեղծ է, գրիչ է, բայց ոչ գործիչ՝ անոր դեպ ի քաղաքային անկախութեանը ձգտող շարժմանն»։ Դա Աարդսյանը բացատրում է նրանով, որ Ալիշանը Վենետիկ գնալուց հետո այլևս «առիթ ունեցած չէ Արեւելք դառնալու, ժողովրդեան հետ շփուելու, անոր վիճակը մոտեն ուսումնասիրելու և քաղաքային խնդիրներուն մասնակցելու ուղղակի»⁶⁹։ Սակայն, դա հիմք չի տալիս ենթադրելու, որ Ալիշանին չեն հուզել հասարակական-քաղաքական խնդիրները, որ նա անտարբեր է հայրենիքում կատարվող իրադարձությունների հանդեպ։ Մենք համակարծիք չենք նաև Սարգսյանի այն տեսակետի հետ, որ Ալիշանի նշանաբանը հայրենիքն ու ազդը սոսկ գրականությունը և «կենցաղագուտ» գիտություններով արթնացնելն է և Ալիշանին որպես «խաղաղական» բնութագրումը։

Ալիշանի հասարակական-քաղաքական հայացքները ձևավորվեցին 1848–1850-ական թվականներին Վենետիկի հեղափոխության ազդեցությունում։ Պատահական չէ, որ հենց այս տարիներին Ալիշանը հնչեցրեց իր ամենավառ և մոնչացող քնարը։ Ադրիականի ալիքների վրա որոտում էին ուռմբերը։ Դուքսերից մինչև աղքատ ձկնորսները սուր և հրացան ձեռքերին գնում էին ուղեւորաշտ, որտեղ որոշվում էր Իտալիայի ճակատագիրը։ Նրանց շուրթերից հնչում էր խրոխտ մարտերգը. «Օ՛ն քաջագունք Իտալիո, ի սեր հայրենյաց, վազենք ի մահ կամ ի յաղթանակ»⁷⁰։ Երիտասարդ Ալիշանի միտքն օրորվում էր «այս մարտի երդերու որոտընդոստ բոմբիւններուն մեջ» և «իր տարաբախտ հայրենիքի մեղրաշուրթ երգչի» դյուրավառ հողին չէր կարող չերգել իր երկրի ավերակները, իր դյուցազուններին, իր հայրենիքի երբեմնի փառքը, նրա ազատությունը։ 1849 թ. Վենետիկի հերոսամարտի թարմ տպավորության ներքո Ալիշանը գրեց «Օ՛ն անդր յառաջ»-ը, որը ազատության ու պայքարի յուրատեսակ կոչ է։ Ազատամարտի թմբուկն է որոտում «Բա՛մ» և «Հայրենավրեժ հայկազունները» նետվում են մարտի. սա վերջին պատերազմն է գուցե, ազատության պատերազմը, որից հետո Արարատի գագաթին հավերժորեն ծփալու է նահապետի պաշտելի եռագույնը... Ավետիք Իսահակյանի հետ ունեցած իր զրույցի ընթացքում Ալիշանն ասում է. «Իհարկե հայ ժողովուրդը լավ գիտեր, որ իր սեփական ուժերով չպիտի կարողանար թոթափել թաթարական լուծը, ինչպես առանց Եվրոպայի չպիտի կարողանային ազատվել ո՛չ Հունաստանը և ո՛չ Բուլղարիան։ Հայ ժողովուրդն էլ, նրանց հետևելով, հույսը դրել է քրիստոնյա Եվրոպայի օգնության վրա, մեծ քաղաքակիրթ պետությունների մարդասիրության վրա»⁷¹։ Ալիշանը նման մտածողությամբ

68 Նույն տեղում, էջ 173։

69 Հ. Բ ա ռ ս ե ղ Վ. Ս ա ռ դ ս ե ա ն. Երկհարիւրամեայ գրական գործունեություն եւ նշանաւոր գործիչներ. Վենետիկ, 1905, էջ 330։

70 Ս. Ե Ր Ե Մ Ե Ա Ն. Ազգային դեմքեր, 3-րդ շարք. Վենետիկ, 1913, էջ 190։

71 Ա. Ի ս ա հ ա կ յ ա ն. Ղևոնդ Ալիշան. – Ալիշանը ժամանակակիցների հուշերում. Երևան, 1979, էջ 221–222։

յունը համարում է «մեծադուլն և բազմադետ» սխալ և որպես հիմնավորում բերում է Թերզյան հայ կարգինալի օրինակը, որը կոտորածների ժամանակ գնում է Հոռոմ, «ընկնում է սրբազան պապի ոտները, աղերսում է, որ պապը դիմում անե քրիստոնյա մեծ պետություններին՝ Անգլիային, Ռուսիային, Ֆրանսիային, Գերմանիային, որ ջարդարար թուրքի ձեռք բռնեն»։ Սրբազան պապն ասում է. «Այդ քրիստոնյա մեծ պետություններն են հայերին կոտորողները, ես որի՞ն դիմեմ»⁷²։ Այո դատողության շարունակությունն է հանդիսանում «Շիրակ» աշխատության մեջ Ալիշանի արտահայտած այն միտքը, որ եվրոպական քրիստոնյա պետությունների թուլյալույթյամբ և հրահանգով Ասիայի բարբարոս խաժամուժը նվաճեց և վերեց հայոց աշխարհը, ինչպես նաև Անի քաղաքը⁷³։ Եվրոպական պետությունները ոչ միայն չօգնեցին և չպաշտպանեցին իրենց ապավինող հայ ժողովրդին, այլև պատեհ առիթ դտան շահագործելու հայի արյունը և դա իրականացավ, որովհետև «Եվրոպայու «բարոյականը ավերված է»։ Բարոյապես սնանկացած է նա. նախնական մարդու բնական մարգասիրությունն էլ չունի անգամ։ Նա ստախոս է, շահամոլ է և եսական։

Պետք է ընդմիջտ երես չբլել այդ փչացած եվրոպայից և դարչանքով երես չբլել⁷⁴», — ասել է Ալիշանը Իսահակյանին։ Դա էր պատճառը, որ իր կյանքի ծաղկուն հասակում ազատագրական շարժումներով ոգևորված, «ի գե՛ն ի վրէ՛ժ» կոչող Նահապետը իր կյանքի ձմեռնամուտին, պահ մը կը վարանի եղելութեանց վրայ, և յեղափոխութեան (հայ հեղափոխության — Յու. Հ.) պատճառը իր երգերու մեջ փնտռելու խղճահարությունը կ'ունենայ⁷⁵ և հուսահատված իր ամբողջ հույսը գրել էր Բարձրյալի վրա... Ժամերգությունը դեռևս չսկսված՝ եկեղեցու կիսախավար որևէ անկյունում նա ծունկի էր դալիս, ճերմակ մաղերը հատակին փռած և կիսաձայն մրմնջում էր իր ազոթքը առ Աստված և առ հայ ժողովուրդը...

ФИЛОСОФИЯ ЖИЗНИ ГЕВОНДА АЛИШАНА
(К 100-летию со дня смерти)

ЮРИЙ ОВАКАНЯН

Р е з ю м е

Наследие Гевонда Алишана как поэта, историографа, географа, педагога и богослова изучали С. Еремян, Б. Саргсян, А. Чопанян, А. Чемчегян, А. Тертерян, С. Штикийн и др. Однако Алишан-философ и моралист все еще остается неизвестным. Даже крупные историки философии А. Габриелян и В. Чалоян не смогли правильно оценить реальное значение мхитаристов и Алишана в армянской культуре и, в частности, истории философии. Настоящая статья яв-

72 Նուրյն տեղում:

73 Ղ. Ա լ ի շ ա ն. Երկեր, էջ 185:

74 Ա. Ի ս ա հ ա կ յ ա ն. նշվ. աշխ., էջ 222:

75 Ս. Երեմյան. նշվ. աշխ., էջ 194:

ляется первым опытом исследования философских взглядов Алишана. Философия Алишана весьма самобытна и противоречива. С одной стороны это продолжение традиций средневековой философии, с другой — резкий переход к теории географического детерминизма и к анализу национального бытия. С одной стороны Алишан признает сотворение Вселенной и Человека, с другой — объясняет возникновение наций, особенности их духовных качеств теорией географического детерминизма. Опорой его философии является любовь к нации, которая тоже — „естественный завет“ и не заложена философами. Нацию и родину нужно любить, но нельзя утрировать эту любовь. „Не допустимо не только постоянно ронять нацию, клеймить ее, но и все время расхваливать и петь дифирамбы ей, поскольку, если в первом случае нация обесиливается, то во втором случае ослепляется разум и появляется тщеславный патриот, висящий в воздухе и не имеющим опоры“, — говорит Алишан.

PHILOSOPHY OF LIFE OF GHEVOND ALISHAN
(To the centenary of his death)

YURI HOVAKANYAN

S u m m a r y

Ghevond Alishan is well known in Armenian society as a poet, historiographer, geographer, teacher, theologian and clergyman thanks to works by S. Yeremian, B. Sargsian, A. Chobanian, A. Tchemtchemian, A. Terterian, S. Shtikian and others. Nevertheless Alishan philosopher and moralist still remains unknown. Even prominent historians of philosophy H. Gabrielian and V. Chaloyan couldn't truly estimate the real significance of the Mkhitarians and Alishan in Armenian culture, and, particularly in the history of philosophy. This article is the first experience of investigation of Alishan's philosophic views. Alishan's philosophy is quite original and contradictory. On the one hand this is a continuation of traditions of medieval philosophy. On the other hand it is an abrupt transition to the theory of geographical determinism and analysis of national subsistence. On the one hand Alishan accepts the Creation of the Universe and Man, on the other hand explains the beginning of nations, the features of their spirits by the theory of geographical determinism. The foundation of his philosophy is love to the nation, which is also a "natural Testament" and isn't set by philosophers. One must love nation and fatherland, but one can't exaggerate this love, it isn't allowed not only to shame your nation and also always to praise it, because if in the first case the nation weakens, in the second case the mind goes blind, and appears a conceited patriot, hanging in the air, having no foundation, says Alishan.